

II - ARABAKO LURRALDE HISTORIKOAREN TOKI ADMINISTRAZIOA

ARTZINIEGAKO UDALA

Behin betiko onespena ematea Artziniegako Udalaren kaleen, landa bideen, baso pisten, lursailen eta mendien aprobetxamendu berezia arautzen duen ordenantzari

Udal honek, 2021eko urriaren 14ko ohiko bilkuran, erabaki zuen hasierako onespena ematea Artziniegako Udalaren kaleen, landa bideen, baso pisten, lursailen eta mendien aprobetxamendu berezia arautzen duen ordenantzari.

Ez da inolako erreklamaziorik aurkeztu 2021eko azaroaren 3an 125. zenbakiko ALHAOn argitaratutako iragarkiaren bidez jendaurrean jarri ostean; hortaz, behin betiko onetsita geratzen da, honako testu honekin:

ARTZINIEGAKO UDALAREN KALEEN, LANDA BIDEEN, BASO PISTEN, LURSAILEN ETA MENDIEN APROBETXAMENDU BEREZIA ARAUTZEN DUEN ORDENANTZA

1. artikulua. Xedea

Udal honek, bat etorritoki Araubidearen Oinarriak arautzen dituen apirilaren 2ko 7/1985 Legearen 25. artikuluan eta Toki Erakundearen Ondasunen Araubidea eta bat datozen gainerako lege xedapenak onesten duen ekainaren 13ko 1372/1986 Errege Dekretuan aurreikusitakoarekin, udal honen titulartasuneko kaleen, landa bideen eta baso pisten erabilera komun, berezi eta normala arautzen du, honako hauen ondorioz hondatzea saihesteko: ibilgailu astunak gaizki erabiltzea eta ibilgailu horietan ibiltzea, eta baso ustiapenak, nekazaritza ustiapenak, eraikuntza lanak eta lur mugimenduak direla eta zura eta enborkiak garraiatzearen ondorioz egiten den aprobetxamendua.

2. artikulua. Aplikazio eremua

Ordenantza hau udal honen jurisdikziokoak diren eta Artziniegako Udalaren ondasun eta eskubideen inbentarioan sartuta dauden kale, landa bide eta baso pista guztietan aplikatzen da.

Ordenantza honen ondorioetarako, bideak eta pistak izango dira udalerriko hainbat barruti landa eta mendi finkekin, ibaiekin, basoekin, herri lurrekin edo larreekin lotzen dituzten bide publikoak, gehienbat nekazaritza edo basogintzako finken eta/edo ustiatzearen lanetarako erabiltzen direnak.

Ordenantza honi dagokionez, kale, landa bide eta baso pista guztiak hartuko dira kontuan, baita Arabako Lurralde Historikoko landa bideak erabili, kontserbatu eta zaintzeko otsailaren 13ko 6/1995 Foru Arauak aipatzen duen bideen erregistroan jasota dauden landa bideak ere, eta Arabako Foru Aldundiarekin koordinatuta kudeatuko dira.

3. artikulua. Eskumenak eta zaintza

Artziniegako Udalari dagokio, behar denean Arabako Foru Aldundiarekin koordinatuta, udalaren jurisdikziopeko kale, landa bide eta baso pista guztiak zaintzea eta haiei loturiko edozein eginkizun gauzatzea, baita zehapenak ezartzea ere. Zaintza lan hori udalak edo horretarako izendatuko diren langileek egingo dute, eta betebeharrak nagusia izango da ikuskatzea bai bide sarea, bai kale, bide eta pistak zein horiek babesteko azalerak behar bezala erabiltzen direla, erabili ahal izango direla eta kontserbatuko direla bermatzeko.

Zaintzaren ardura dutenek egiten diren arau hausteak salatu ditzakete, bai eta arau hausteak identifikatu, nor diren jakinez gero, baita arau hausteak buruzko datuak hartu ere.

4. artikulua. Lizentzia

Ordenantza honetan arautzen diren eta udalaren titulartasunekoak diren bideak edo baso pistak erabili behar dituzten garraiolariak edo kontratistek, jabeek eta erabiltzaileek lizentzia eskatu beharko diote Artziniegako Udalarari. Eskabidean, honako datu hauek adierazi beharko dituzte:

- Jabearen edo kontratistaren identifikazio datuak.
- Garraiatzeko erabiliko diren ibilgailuei buruzko datuak (matrikula, modeloa eta marka), eta egingo den joan-etorri kopurua, joan-etorri bakoitzean garraiatuko den zama eta joan-etorriak nondik nora egingo diren, kokapen plano batean adierazita.
- Garraiatuko diren materialen estereoak edo tona metrikoak.
- Garraioa noiz hasi edo noiz bukatuko den.
- Materialak pilatu behar badira, pilaketa non egingo den adierazi behar da grafikoki.
- Materiala zein menditatik edo lekutatik datorren eta mendi edo leku hori non dagoen; hala badagokio, katastroko erreferentzia zehaztu beharko da.
- Zein bide publiko erabili nahi den, hala badagokio, kokapen plano batean ibilbidea zehaztuta.
- Hala badagokio, egin beharreko mozketak egiteko baimena, tasazio-kubikazio inprimakiaren fotokopia eta basogintzan eskumena duen agintaritzak emandako baimena.
- Udalak lizentzia emateak ez du kentzen egingo den jarduerarako behar den beste edozein baimen lortu beharra.

5. artikulua. Debekuak

Debekatuta dago honako hauek erabiltzea:

- Beldar ibilgailuak.
- Katedun ibilgailuak.
- Arrasterako ibilgailuak (bide zoruan).
- Errodatzeko bandak dituzten ibilgailuak.
- 26 tona metrikoko pisu gordina baino handiagoa duten ibilgailuak eta hiru ardatz baino gehiagoko kamioiak.
- Basoko materiala ateratzeko nahiz beste material batzuk garraiatzeko erabiltzen diren ibilgailuek ezin izango dute kalterik edo narriadurarik eragin udalaren titulartasuneko edo administrazioko bideetan.
- Inola ere ez da baimenduko zuhaitziak edo bestelako laboreak landatzea, baldin eta beren ezaugarriengatik bidearen edo pistaren segurtasunari, egonkortasunari eta egoera fisiko egokiari eragin badiezaieke. Lursailaren jabeak izango du horiek betearazteko ardura. Ohar-tarazi eta hala ere ez-betetzereen bat gertatuz gero, udalak subsidiarioki jardun ahal izango du. Ondoren, dagozkion erantzukizunak eskatuko dizkio jabeari, eta horren berri emango dio baso agintaritzari.

6. artikulua. Ebazteko epea

Lizentzia eman ala ez ebazteko, gehienez ere 15 egun izango dira, 4. artikuluan esandakoa betez lizentzia eskatzen den egunetik aurrera. Denbora hori igarota berariazko ebazpenik eman ez bada, eskaera onetsi dela esan nahiko du.

7. artikulua. Tasak

1. Ondoren zehazten diren tasak ordaintzeko baldintzarekin ematen da lizentzia eta, ordaindu arte, ezingo zaio ekin erabiltzeari edo aprobetxatzeari.

2. Tasa ordaintzen ez duenari lizentzia kenduko zaio, besterik gabe.

3. Udalaren titulartasunaren edo administrazioaren menpe dauden bideen aprobetxamendu bereziagatik ordaindu beharreko tasak direla eta jasotako dirua bide horiek kontserbatzeko, mantentzeko eta hobetzeko erabiliko da.

Tasa zenbat den kalkulatzeko honako eskala hau erabiliko da:

BIDEAREN LUZERA	FIDANTZA
0,5 kilometro baino gutxiago	1,35 euro/estereo edo 2,04 euro/tona metriko
1 kilometro baino gutxiago	1,95 euro/estereo edo 2,94 euro/tona metriko
1 kilometro baino gehiago	2,25 euro/estereo edo 3,42 euro/tona metriko

4. Zur pilatzeak eragindako lurzatiaren barruan egin behar dira. Material, egur edo enborki pilaketak bideen edo zona publikoen ertzean egiten badira, honako tasa hau aplikatuko da: 0,15 euro/estereo edo 0,23 euro/tona metriko.

5. Tasa horiek landa bideei ere aplikatuko zaizkie, baldin eta Arabako Lurralde Historikoko landa bideak erabili, mantendu eta zaintzeko otsailaren 13ko 6/1995 Foru Arauaren mendeko bideen erregistroan inskribatuta badaude.

8. artikulua. Luzapena

Aprobetxamendua lizentzian adierazitako egunean bukatzen ez bada, lizentzia luzatzeko eskatu beharko da.

9. artikulua. Agiriak aurkeztea eta zaintza

Garraioak dirauen denbora osoan, garraiolariak lizentzia ematen zaiola adierazten duen erabakiaren jakinarazpena eta tasa eta fidantza ordaindu dituela egiaztatzen duten ordainketa gutunak (jatorrizkoak edo kopia) eraman beharko ditu. Agiri horiek udalaren arduradunei, basozainari eta/edo bide jagoleari erakutsi beharko dizkie, eskatzen badizkiote.

10. artikulua. Fidantza

Ordenantza honetan aipatzen diren bideak eta pistak erabili baino lehen, lizentzia eskatu duenak fidantza ordaindu beharko du. Fidantza hori bideak eta baso pistak erabiltzean sor daitezkeen kalteak ordaintzeko izango da. Fidantza diruz ordaindu ahal izango da edo egon daitezkeen kalteak ordaintzeko moduko bankuko abalaz. Halaber, udalak alde aurretik adostasuna adierazita, aseguru poliza bat erabili ahal izango da fidantza gisa.

Fidantza, gutxienez, 1.500,00 euro (mila eta bostehun euro) izango da beti.

Baso batetik egurra ateratzeko emandako fidantza ezin izango da beste baterako erabili, aprobetxamenduak batera egiten badira ere.

Fidantza itzultzeko prozedurari buruzko ebazpena emateko gehienezko epea hilabetekoa izango da, eskaera egiten denetik aurrera, eta alde aurretik basozainaren aldeko txostena beharko da. Epea igarota berariazko ebazpenik eman ez bada, eskaera onetsi dela esan nahiko du.

11. artikulua. Bideak garbitzea

Aprobetxamenduaren onuradunek bideen edo pisten ohiko erabilera publikoa bermatu beharko dute beti, eta horretarako, aprobetxamenduak dirauen denbora osoan, beharrezko diren konponketak eta garbiketa lanak egin beharko dituzte. Horrela ez bada, lan horiek udalak egin ahal izango ditu onuradunen kontura.

Edonola ere, onuradunek behar diren neurri guztiak hartu beharko dituzte zirkulazioa ez eragozteko; beraz, ezin izango dute bidean enborrik edo abarrik utzi, eta ibilgailuek han utzitako produktuak (lurra, harriak eta abar) kendu izango beharko dituzte.

Horrez gain, onuradunek garbi eta bertatik igarotzeko moduan mantendu behar dituzte hormigoiz asfaltatutako zonak eta, behar izanez gero, urez garbituko dituzte, beren kontura eta beren bitartekoak erabiliz.

12. artikulua. Txosten teknikoak

Udalak ikuskaritza bisita egingo du bideak erabili aurretik eta ondoren, eta haien egoerari buruzko akta egingo du. Akta egiteko, bertaratzeko gonbita egingo zaie eskatzaileari eta garraiatutako materialen jabeari, eta bertan izango da, egokitzen jotzen bada, basozaina ere. Akta argazkiak, planoak, ikus-entzunezkoak eta abar sartu ahal izango dira, bertan adierazten dena frogatzeko.

13. artikulua. Konponketako obrak

Txosten teknikoa ikusita, lizentziaren titularrari eta garraiatutako materialen jabeari egin beharreko konponketen berri emango zaie, eta egiteko zein tarte duten adieraziko zaie. Epea igaro bada eta egin beharreko konponketak egin ez badituzte, udalak berak egingo ditu, baina konponketen kostuak onuradunaren kontura izango dira; hau da, konponketak egiten gastatzen dena ordaindutako fidantzatik kenduko da. Fidantzaren dirua ez bada nahikoa konponketaren gastuak ordaintzeko, falta dena ordaintzeko eskatuko zaio onuradunari.

Baldin eta segurtasun arrazoiak edo udalak behar bezala egiaztatutako bestelako arrazoiak direla eta ezin bada geroratu kalteen konponketa, berehala lehengoratu ahal izango dira, lizentziaren titularrari eta materialen jabeari jakinarazi ondoren, eta dagokien zenbatekoa kalteak eragin dituenari eskatuko zaio gero.

Udalaren bideren edo pistaren batean kalteak gertatuz gero, eta haiek aprobetxamendu titular batek baino gehiagok erabiltzen badituzte batera, erabiltzaileen artean banatuko dira proportzionalki kalteen erantzukizunak.

14. artikulua. Jabeen erantzukizuna

Garraiatutako materialen jabeak erantzule solidarioak izango dira ordenantza honetako betebeharrei dagokienez. Haiek izango dute ardura udalari egurra ateratzeko asmoaren berri emateko, bai eta lana egingo duen kontratistaren gaineko ardura ere. Haiek edo kontratistak ordainduko dizkiote udalari tasak eta fidantza (ordaindu behar bada).

15. artikulua. Bideak erabiltzeko egutegia

Printzipioz, udalaren kaleen, landa bideen eta baso pisten erabilera bereziko lizentziaren ondorioetarako, ezin izango dira inolaz ere bide horiek egurra edo enborkiak garraiatzeko erabili abenduaren 15etik apirilaren 15era bitartean.

Era berean, eguraldia edo beste arrazoi batzuk direla eta, udalak ibilgailu astunen zirkulazioa debekatu edo baimendu dezake zirkulaziorako debekatutako egutegitik kanpo zein haren barruan. Ibilgailu astun horiek materialak eta lurra mugitzeko edo egurra edo enborkiak garraiatzeko kale, landa bide eta baso pistetan egin behar duten ibilbidea zehaztea ere udalaren esku egongo da.

Bestalde, eguraldi txarrarekin bideak bereizi gabe erabili ez daitezen, eta halako garaietan kalte handirik gerta ez dadin, udalak fidantza bat aurkezteko eskatu dezake, balizko kalteak zenbatetsi eta kalte horiekiko proportzioan kalkulatu dena; lizentzia eten edo ukatu ere egin daiteke, baldin eta aurreikusitakoaren arabera kalteak konpontzea oso zaila edo garestia bada.

16. artikulua. Baja aitortpena

Aprobetxamendua bukatu ondoren, interesdunek baja aitortpena aurkeztu behar dute nahi-taez, eta bertan adierazi behar dute aprobetxamendua bukatutzat jo dela. Aitortpen hori sinatu egin beharko dute bai lizentziaren titularrak, bai garraiatutako materialen jabeak ere. Udalari entregatu beharko diote, eta hura ados agertuz gero, aurkeztu eta hurrengo egunetik aurrera izango du eragina bajak.

17. artikulua. Lur mugimenduak eta bestelakoak

Bide horiek lurra mugitzeko edo motordun ibilgailu astunak edo antzekoak erabiliz materialak garraiatzea dakarren beste edozein jardueratarako erabiltzen badira, jarduera horien enpresa titularrek ibilbide guztia onik zaintzeko betebeharra izango dute. Era berean, udalaren baimena lortzeko izapideak ere egin beharko dituzte.

18. artikulua. Ingurumen baldintzak

Kaleak, bideak edo pistak erabiltzen dituen orok ingurumen baldintza hauek bete behar ditu:

- a) Ezin da inolako hondakinik utzi bide eta pista bazterretan, esate baterako, plastikozko poltsak, arrastatze kableak, hondakin organikoak, gasolina latak eta antzekoak.
- b) Bideetan ibiltzen diren ibilgailuek ezin dute gai kutsatzailerik isuri, hala nola gasolioa, olio, lubrifikatzaileak eta abar, eta egunean izan behar dute IAT txartela.

Artziniega, 2021eko abenduaren 20a

Alkatea

JOSEBA VIVANCO RETES